

## Sve spremno za rukometni spektakl: Na krilima navijača do pobjede protiv Bjelorusije i plasmana na EP



Rukometna reprezentacija BiH trenirat će vjerovatno prvi put u punom sastavu večeras, nakon što se ekipi priključe igrači koji nastupaju u njemačkim klubovima, Benjamin Burić i Josip Perić, čiji se dolazak očekuje svakog trenutka, rečeno je našem portalu u stručnom štabu naše selekcije.



Izabranici selektora Bilala Šumana odradili su do sada deset treninga i raspoloženje u ekipi pred duel protiv Bjelorusije na visokom je nivou.

-U Mejdanu imamo dobre uslove za rad, treniramo dva puta dnevno i vjerujem da ćemo biti potpuno spremni za duel sa Bjelorusijom. Iako ćemo nastupiti bez povrijeđenih Vranješa, Tarabochie, Nuića i Vegara sve karte držimo u svojim rukama i vjerujem da ćemo uz pomoć publike u Mejdanu proslaviti direktan plasman na Evropsko prvenstvo – izjavio je selektor naše reprezentacije, Bilal Šuman.

Večeras oko 23 sata očekuje se dolazak u Tuzlu reprezentativaca Bjelorusije, koji su za sutra u 11 sati rezervisali termin za prvi trening.

Naši će igrači sutra trenirati dva puta, a u srijedu, na dan utakmice, imat će samo jedan, relaksirajući trening u jutarnjim satima.

U Sport klubu Mejdana, u utorak u 11 sati zakazana je konferencija za novinare u povodu kvalifikacione rukometne utakmice za EP 2020. godine, BiH – Bjelorusija.

Novinarima će se obratiti selektori BiH i Bjelorusije, Bilal Šuman, odnosno, Yuri Shevtsov, te neko od igrača, rečeno je Feni u RS TK koji je tehnički organizator susreta.

– U dvorani je postavljena specijalna podloga i sve druge priprema za utakmicu već su završene i, praktički, susret može početi – rekao je našem saradniku predsjednik RS TK, Alija Hasić.

Ulaznica za utakmicu ima još vrlo malo, tako da se očekuje da će u dvorani Mejdana s ulaznicama biti oko 4.000 gledatelja.

Utakmica 5. kola kvalifikacija za EP 2020. godine (grupa 5) između BiH i Bjelorusije igra se u srijedu od 20 sati u velikoj dvorani Mejdana. (mp, tl – Foto: Miro Petrović)

